

高爾夫球 ê 人生觀

林俊育

高爾夫球是我 siōng kah 意 ê 休閒運動，因為 phah 高爾夫球 m̄nā thang 培育身心，mā ē tâng 領會 tiòh ná 親像人生歷程 ê 體驗。

球場規劃做十八個洞，tòh 是 kā 人生分做十八個階段；tāk 個洞 lóng 有發球台，親像人生各階段 ê 起點，球道親像人生 ê 坦途大道，長草區親像坎坷 ê 人生，障礙區親像人生 ê 陷阱，界外親像誤入歧途，果嶺親像 óa 近成功 ê 邊緣，球洞親像人生階段 ê 成功點。球道有直 liuliu ê，mā 有 òng 倒 pêng 彎曲 ê，á 是 òng 正 pêng 彎曲 ê，有 ê 是平坦 ê，mā 有高 kē 起起落落 ê，tú 親像人生 ê 旅途是千變萬化。Phah 完十八洞，kahná 辛苦奔波行完一生，kā 各洞 ê 總桿數加起來，tòh 是人生 ê 成果。

小白球 ná 親像一個性命體 tī 親像人生舞台 ê 球場頂面飛、跳、滾，它 ê 方向 kah 距離完全決定 tī 球員 ê 揮桿。Tāk 個球員 ê 揮桿狀況無全，產生各種 ê 性命的 tùi phah 出去 ê 小球表現出來，好球 ēhō 球員歡喜 kah 一直 hoah 好，pháin 球 mā ē hō 球員 ài 哭無目屎，反悔怨嘆當初無 kā 球 phah 好。Phah 完十八洞 mā 等於行完一生，tòh 是蓋棺論定 ê 時，球員一定 ē 體驗 tiòh 一場人生 ê 喜怒哀樂 kah 酸甜苦辣。

Hiah chē 人迷 tiòh 高爾夫球，thang 講是因為無滿意 ē tâng koh 來一 pái，下決心 ài kā chit pái ê 失誤記 tiâu，m̄ thang koh 失錯，希望 ē tâng 有 koh khah 好 ê 成果。M̄koh，你 ē tâng 下決心，beh 行出來 tòh bē tâng 由你做主；tú 親像羅馬書 7：18 「我有做好 ê 意願，無做好 ê 氣力。」

Tútiòh 不如意 ê 時，只好自我安慰講無 tāk 工 lóng 是過年過節，一切 lóng 由創造主掌握控制。Koh 再高球技 ê 人 mā 無法度掌握控制 chitê 小白球 ê 方向 kah 距離，iáukoh ài 有 koân 度 ê 智慧加上運氣好，chiah ē tâng phah 出好成績。人有 koh 再好 ê 能力，若無高超 ê 智慧 kah 掌握運命 ê 上帝 ê 恩典，伊一生 ê 成就 mā 是普普 á 而已。

高爾夫球賽 siōng 大 ê 特色是強者禮讓弱者 ê 「差點」，英文字 kah 殘障者全款是 “handicap”。人類 kah 其它動物無全 ê 所在，tòh 是身心健全 ê 人 ē 照顧關懷殘障人士，hō伊 ē tâng 生存落去；á 殘障 ê 動物得 bē tiòh 全類 ê 照顧，tòh 必死無疑。社會有文明 á 無，tiòh 看 chitê 社會對殘障人士 ê 關懷程度；高爾夫球賽 ē tâng kā 人類 ê 文明面融入遊戲規則，tùi 遊戲中 thang 領悟 tiòh 人生 ê 崇高境界，ē sái 講是 siōng 文明 ê 運動比賽。

一號發球桿是 beh phah siōng 遠 ê 球桿，親像一個計畫開始轟轟烈烈 ê 大排場，無一定保證有好成果，球 chiūn 果嶺以後 ê 推桿 chiah 是 siōng 重要 ê 關鍵；mā tòh 是講 óa 近成功 ê siōng 尾關頭是 siōng 重要 ê 時刻，mā tòh 是所謂 ê 「siōng 尾五分鐘」，把握 ē tiâu ê 人 chiah ē 贏。開始 ê 幾桿 phah kah 好，m̄ thang 歡喜 siuⁿ 緊 soah 得意忘形，等到球進洞 chiah 算數。

揮桿 ná 親像做 tāichì ê 每一個步數，tāk 桿 lóng tiòh 小心好好 á phah，因為揮桿落去 tòh 算一桿，ná 親像 ták khō銀 kantaⁿ ē tàng 開一 pái，bē tàng 無慎重。

果嶺頂面 ê 球洞 lóng 插一支旗桿當做目標 teh 引 chhōa，thang hō 咱來「ng 標桿直走」。「過去 ê 種種 ná 親像昨日死，未來 ê 種種 ná 親像今日生」，真正人生 lóng tiòh「重頭生」，phah 過 ê 一桿已經成做既定 ê 事實，mài koh 計較是好是 bái，期待新 ê 一桿 hō咱有重新開始 ê 機會，ài 有「重頭生」ê 覺悟來好好 á 把握每一個揮桿。

我真欣賞台北高爾夫球場 ê 一个牌語：「加 phah 身健康，少 phah 心愉快」，這是何等 ê 心胸！講起來真簡單，做起來 tòh 真 oh。Phah 高爾夫球真像人生 ê 體驗，咱對人生 ê 挫敗 mā tiòh 有「thēh 起，放 ē 落」ê 心胸，時時探討人生 ê 真理，一切順其自然，tòh 有充滿喜樂 ê 人生。